



commonwealth  
games  
**RWANDA**

# Icyegeranyo cy'amakuru y'imikino yaranze icyumweru

2023

Taliki 03- 05 Ugushyingo



P.1 Volleyball : Gisagara VC na RRA VC zegukanye igikombe cya shampiyona

## Ijambo ry'ibanke

Komite Olempike y'u Rwanda yashyizeho iki cyegeranyo mu rwego rwo kurushaho kumenyekanisha ibikorwa byayo n'iby'abanyamuryango bayo (Amashyirahamwe y'lmikino mu Rwanda) hagamijwe gukomeza guteza imbere siporo no kuyikundisha Abanyarwanda muri rusange by'umwihariko abakiri bato.

Iki cyegeranyo gikubiyemo amakuru n'ibikorwa bya siporo byaranze icyumweru, kikazajya gisohoka rimwe mu cyumweru.

Ntigisimbura kandi izindi nzira Komite Olempike y'u Rwanda isanzwe ikoresha mu kugeza amakuru ku banyamuryango bayo n'abanyarwanda muri rusange.

## Ibirimo

- P1 **Volleyball:** Gisagara VC na RRA VC zegukanye igikombe cya shampiyona
- P2 **Football:** Habaye imikino y'umunsi wa 10 wa shampiyona
- P2 **Cycling:** Habaye amatora yo kuzuza inzego muri FERWACY
- 3 **Sitting Volleyball:** Ikipe y'u Rwanda yitabiriye igikombe cy'Isi
- P4 **Football:** FERWAFA yatangije shampiyona y'Abangavu
- P4 **Kung Fu Wushu:** Imikino y'amajonjora muri shampiyona y'igihugu yasorejwe i Gicumbi
- P5 **Football:** Amavubi yatangiye kwitegura imikino yo gushaka itike y'igikombe cy'Isi 2026
- P5 **Triathlon:** Ngendahayo na Uwiringiyimana begukanye irushanwa ritangiza umwaka w'imikino
- P6 **Amputee Football:** Rugwiyo yongeye gutorerwa kuyobora RAF
- P6 **Basketball:** KPA na REG BBC zabonye itike y'imikino y'Afurika
- P7 **Golf:** Ashley Awuor yegukanye irushanwa mpuzamahanga ryabereye mu Rwanda
- P7 **Mountain Bike:** Daniel Gathof na Bart Classens begukanye Rwandan Epic 2023
- P8 **Tennis:** Habaye amatora ya Komite nyobozi nshya ya RTF
- P8 **Taekwondo:** Dr. Hakizimana yitwaye neza mu mahugurwa yabereye muri Koreya

# Volleyball : Gisagara VC na RRA VC zegukanye igikombe cya shampiyona

Taliki 05 Ugushyingo 2023 ni bwo hasojwe shampiyona y'icyiciro cya mbere mu bagabo n'abagore mu mukino wa Volleyball "Rwanda National Volleyball League 2023" aho ikipe ya Gisagara VC mu bagabo na RRA VC mu bagore zegukanye igikombe.

Iyi shampiyona yatangiye taliki 21 Mata 2023, amakipe yakinnye hagati yayo umukino ubanza n'uwo kwishyura hanyuma ikipe 4 za mbere zikina imikino ya kamarampaka "Playoffs 2023".

Taliki 04 na 05 Ugushyingo 2023 ni bwo habaye imikino ya "Playoffs 2023" yabereye muri BK Arena aho amakipe 4 ya mbere muri buri cyiciro yakinnye hagati yayo amanota akongerwa ku yo yari afite hasozwa imikino ya shampiyona.

## Uko imikino yagenze

### Mu bagabo

#### Taliki 04-11-2023

- Gisagara **3-0** REG VC (25-18, 25-19 & 25-21)
- REG VC **3-1** APR VC (25-19, 25-23, 23-25 & 25-19)
- Gisagara VC **3-0** Police VC (25-21, 25-19 & 25-18)
- Police VC **3-0** APR VC (25-21, 25-21 & 25-19)



#### Taliki 05-011-2023

- Police VC **3-1** REG VC (30-28, 25-22, 24-26 & 25-21)
- APR VC **3-2** Gisagara VC (20-25, 26-24, 25-20, 19-25 & 15-12)

### Mu bagore

#### Taliki 04-11-2023

- RRA VC **3-1** Ruhango VC (25-18, 23-25, 25-17 & 25-14)
- APR VC **3-0** Police VC (25-23, 25-21 & 25-20)
- RRA VC **3-1** Police VC (24-26, 25-23, 25-19 & 25-23)
- APR VC **3-0** Ruhango VC (25-14, 25-17 & 25-22)



#### Taliki 05-11-2023

- RRA VC **3-0** APR VC (25-11, 25-21 & 30-28)
- Police VC **3-0** Ruhango VC (25-14, 25-13 & 25-14)

Nyuma y'iyo mikino, ikipe ya Gisagara VC mu bagabo yegukanye umwanya wa mbere n'amanota 43 ikurikirwa na APR VC n'amanota 37, ku mwanya wa 3 haza Police VC n'amanota 36 naho REG VC iza ku mwanya wa 4 n'amanota 35.

Mu bagore, RRA VC yasoreje ku mwanya wa mbere n'amanota 34 ikurikirwa na APR VC (33), Police VC (23) na Ruhango VC (10).

Ikipe za mbere (Gisagara VC na RRA VC) zahawe igikombe na miliyoni 2, ikipe APR VC mu bagabo n'abagore ihabwa miliyoni 1,5 naho Police VC mu bagabo n'abagore ihabwa miliyoni 1.

Ikipe ya Gisagara VC mu bagabo yaherukaga gutwara igikombe cya shampiyona muri 2021 kuko igiheruka muri 2022 cyari cyegukanwe na REG VC naho mu bagore, RRA VC yaherukaga kwegukana igikombe muri 2018 mu gihe igikombe giheruka cyari gifitwe na APR VC.



## Football : Habaye imikino y'umunsi wa 10 wa shampiyona

Taliki 03 kugeza 05 Ugushyingo 2023 habaye imikino y'umunsi wa 10 wa shampiyona y'icyiciro cya mbere mu mupira w'amaguru mu bagabo. Nyuma y'iyi mikino shampiyona yahise isubikwa kubera imyiteguro y'ikipe y'igihugu "Amavubi".

### Uko imikino yagenze

#### Taliki 03-11-2023

- Police FC 1-0 Gorilla FC

#### Taliki 04-11-2023

- Rayon Sports 4-1 Mukura
- Musanze FC 1-0 Kiyovu
- Muhazi United 1-2 APR FC
- Marines FC 1-0 Amagaju FC

#### Taliki 05-11-2023

- Etoile de l'Est 1-0 Gasogi United
- Etincelles FC 3-2 Bugesera FC
- AS Kigali 0-1 Sunrise FC

### Urutonde rwa shampiyona 2023-2024

Umwanya	Ikipe	Imikino	Amanota
1	Musanze FC	10	23
2	APR FC	9	21
3	Police FC	9	19
4	Rayon Sports	9	16
5	Kiyovu	10	15
6	Mukura	10	15
7	Amagaju FC	10	14
8	Marines FC	10	12
9	Gasogi United	10	11
10	Muhazi United	10	10
11	Etoile de l'Est FC	10	10
12	Etincelles FC	10	10
13	Bugesera FC	10	09
14	Gorilla FC	10	09
15	AS Kigali	10	09
16	Sunrise FC	9	09



## Cycling : Habaye amatora yo kuzuza inzego muri FERWACY

Taliki 05 Ugushyingo 2023 muri Hill Top Hotel i Remera habereye amatora yo kuzuza inzego mu ishyirahamwe ry'umukino w'amagare mu Rwanda "FERWACY".

Ndayishimiye Samson ni we watorewe kuba Perezida wa FERWACY. Hatowe kandi Bigango Valentin ku mwanya wa Visi Perezida wa mbere, Ruyonza Arlette ku mwanya w'Umunyamabanga Mukuru ndetse na Kataabarwa Daniel watorewe kuba Umubitsi.

Aba batowe bakaba basimbuye abeguye bari muri Komite yari iyobowe na Murenzi Abdallah yari yatowe muri Kamena 2022. Ibi bivuze ko iyi komite izasoza manda yayo muri Kamena 2026.

Abanyamuryango 11 ba FERWACY ni bo bari bitabiriye inteko rusange yabereyemo aya matora yo kuzuza inzego.



## Sitting Volleyball : Ikipe y'u Rwanda yitabiriye igikombe cy'Isi

Taliki O3 Ugushyingo 2023 ni bwo ikipe y'u Rwanda mu mukino wa Volleyball w'abantu bafite ubumuga "Sitting Volleyball" mu bagore n'abagabo yahagurutse mu Rwanda yerekeza i Cairo mu Misiri aho yagiye kwitabira imikino y'igikombe cy'Isi "World ParaVolley Sitting Volleyball World Cup 2023" izatangira taliki 11 igasozwa 18 Ugushyingo 2023.

Iyi mikino y'igikombe cy'Isi yitabiriwe n'amakipe 14 mu bagabo n'andi 10 mu bagore.

Mu bagore, ikipe y'u Rwanda iri mu itsinda A hamwe na Misiri, China, Germany na Mongolia naho itsinda B ririmo Canada, Brazil, Slovenia, Ukraine na Netherlands.

Mu bagabo, ikipe y'u Rwanda iri mu itsinda A hamwe na Misiri na Iraq. Itsinda B rigizwe na Iran, Japan na Algeria, itsinda C ririmo Brazil, China, India na Nigeria naho itsinda D ririmo Germany, Ukraine, France na Great Britain.

Ubwo iri rushanwa riheruka ryabereye i Sarajevo muri Bosnia & Herzegovina, mu bagore, ikipe ya Brazil yegukanye igikombe naho ikipe y'u Rwanda isoreza ku mwanya wa 8 mu makipe 13 yitabiriye.

Mu bagabo, ikipe ya Iran yegukanye igikombe, ikipe y'u Rwanda isoreza ku mwanya wa 13 mu makipe 16 yose yitabiriye irushanwa.






  
**RWANDA MEN SITTING VOLLEYBALL TEAM  
TO 2023 WORLD PARAVOLLEY SITTING VOLLEYBALL WORLD CUP, EGYPT.**




MURENGABAGERA Jean Baptiste



NDAHIRO Jean Claude



NDAYISABA Jean Baptiste



VUNINGABO EMILE CADET  
Team Captain



MIZWENEMANA Jean Bosco



NYITITEGEKA Innocent



NYODOSHIMANA Pacific



NYIRAYA Hamza



NYAGATARE Christophe



SEMANA JEAN



TWAGIRAYEZU Celeste



UNIZEMYIMA Celeste



Head Coach: Dr MOSAAD RASHAD ELIAUTY




  
**RWANDA WOMEN SITTING VOLLEYBALL TEAM  
TO 2023 WORLD PARAVOLLEY SITTING VOLLEYBALL WORLD CUP, EGYPT.**



RAZUBAGIRA Claudine



MUJCYO Marie Adeline



MUSA Hadjane



MURENGABAGERA Claudine



MUSABYIMANA Alice



MUTUYIMANA Chantal



NYIRANETA Solange



NYIRANDUMIYIMANA Agnes



UMUTORE Clementine



UNIZEMYIMA Celeste



Head Coach: Dr MOSAAD RASHAD ELIAUTY



## Football : FERWAFA yatangije shampiyona y'Abangavu

Taliki 04 Ugushyingo 2023, ishyirahamwe ry'umupira w'amaguru mu Rwanda "FERWAFA" ryatangije ku mugaragaro shampiyona y'abatarengeje imyaka 20 mu bakobwa "FERWAFA Youth League U-20 Women 2023".

Uyu muhango wabereye kuri Sitade Ubworoherane mu Karere ka Musanze aho wari witabiriwe na Perezida wa FERWAFA, Munyantwali Alphonse n'abandi bayobozi batandukanye.

Amakipe azitabira iyi shampiyona y'abatarengeje imyaka 20 ashamikiye mu makipe y'abagore asanzwe akina shampiyona y'icyiciro cya mbere n'icya kabiri.

Ubwo hatangizwaga iyi shampiyona kandi ubuyobozi bwa FERWAFA bwashyikirije imipira yo gukina abayobozi b'amakipe y'abakiri bato mu rwego rwo kuyafasha gukomeza kwiybaka.

Iyi shampiyona mu cyiciro cy'Abangavu itangijwe nyuma y'aho no mu Ngimbi yatangijwe ku mugaragaro taliki 28 Ukwakira 2023.



## Kung Fu Wushu : Imikino y'amajonjora muri shampiyona y'igihugu yasorejwe i Gicumbi

Taliki 05 Ugushyingo 2023 , mu Karere ka Gicumbi habereye imikino y'ijonjora y'umunsi wa nyuma muri shampiyona y'igihugu mu mukino njyarugamba wa Kung Fu Wushu "Rwanda Kungu Fu Wushu Championship 2023".

Muri iri rushanwa hari hitabiriye amakipe abiri ari yo Musanze Shaolin Tample ndetse na Red Dragon Gicumbi. Nyuma y'iyo mikino y'amajonjora abakinnyi 8 ni bo babonye itike yo kuzahagararira Intara y'Amajyaruguru mu mikino isoza shampiyona.

Muri aba bakinnyi harimo 4 mu cyiciro cyo kwiyerekwa "Taolu" ndetse n'abandi 4 mu cyiciro cyo kurwana "Sanda".

Biteganyijwe ko abakinnyi bose bitwaye neza mu Ntara zose bazahurira mu mikino yo gusoza shampiyona y'igihugu izabera muri STECOL mu cyanya cyahariwe inganda, taliki 12 Ugushyingo 2023.

Abakinnyi 51 ni bo bazahatana kuri uyu munsi wa nyuma barimo 27 mu cyiciro cyo kwiyerekwa "Taolu" ndetse na 24 mu cyiciro cyo kurwana "Sanda".



## Football : Amavubi yatangiye kwitegura imikino yo gushaka itike y'igikombe cy'Isi 2026

Taliki 05 Ugushyingo 2023 ni bwo ikipe y'u Rwanda "Amavubi" yatangiye imyitozo yitegura imikino ibiri yo mu itsinda C mu rwego rwo gushaka itike y'igikombe cy'Isi 2026 kizabera muri Canada, Mexico na USA.

Ikipe y'u Rwanda "Amavubi" iri mu itsinda hamwe na Nigeria, Benin, Zimbabwe, Afurika y'Epfo na Lesotho.

Biteganyijwe iyi kipe y'u Rwanda "Amavubi" izakina na Zimbabwe taliki 15 Ugushyingo 2023 nyuma ikine na Afurika y'Epfo taliki 21 Ugushyingo 2023. Iyi mikino yombi ikaba izabera kuri Sitade Mpuzamahanga ya Huye guhera saa cyenda (15h00).

Umutoza mushya w'Amavubi, Torsten Frank Spittler ukomokamu Budage yahamagaye abakinnyi 30 bagomba kuzatoranywamo abazakina iyi mikino yombi. Uyu mutoza yungirijwe na Mulisa Jimmy na Rwasamanzi Yves.

### Abakinnyi bahamagawe



## Triathlon : Ngendahayo na Uwiringiyimana begukanye irushanwa ritangiza umwaka w'imikino

Taliki 04 Ugushyingo 2023 mu Karere ka Gicumbi habereye irushanwa ritangiza umwaka w'imikino mu ishyirahamwe ry'umukino wa Triathlon mu Rwanda "RTF". Iri rushanwa "Gicumbi Duathlon National Championship Challenge 2023" ryakinwe mu bice bibiri aho abakinnyi bose bitabiriye babanje gusiganwa ku maguru ibilometero 5 nyuma basiganwa ku igare ibilometero 20 basoza basiganwa ku maguru ibilometero 2,5 basoza bakoze intera ya kilometero 27,5.

Ngendahayo Jeremie mu bagabo ndetse na Uwiringiyimana Liliane mu bagore ni bo begukanye iri rushanwa.

### Uko irushanwa ryagenze

#### • Abagabo ( 27,5 km)

1. Ngendahayo Jeremie 1h02'59"
2. Gatete Vital 1h07'59"
3. Iradukunda Eric 1h08'40"

#### • Abagore ( 27,5km)

1. Uwiringiyimana Liliane 1h24'50"
2. Mukamuhire 1h25'50"
3. Nyirarukundo Rosette 1h30"

#### • Abatwara amahare asanzwe (27,5 km)

1. Ufiteyezu Emmanuel 1h07'05"
2. Kwizera Francois Regis 1h18'16"
3. Ishimwe Daddy 1h19'

Biteganyijwe ko irushanwa rya kabiri rizabera i Kigali taliki 25 Ugushyingo 2023.



## Amputee Football : Rugwiro yongeye gutorerwa kuyobora RAF

Taliki 05 Ugushyingo 2023 muri Kigali View Hotel habereye inama y'inteko rusange y'ishyirahamwe ry'umupira w'amagaru mu bantu bafite ubumuga "RAF". Muri iyi nama, habaye igikorwa cyo kuvugurura gahunda y'igenamigambi y'imyaka 4 (2023-2027) ndetse n'amatora ya Komite nyobozi nshya ya RAF.

Rugwiro Audace wari usanzwe ari Perezida wa RAF yongeye gutorerwa uyu mwanya kugeza muri 2027, Visi Perezida aba Kwizera Louis, ku mwanya w'Umunyamabanga hatorwa Bahati Omar.



## Basketball : KPA na REG BBC zabonye itike y'imikino y'Afurika

Kuva taliki 28 Ukwakira kugeza 04 Ugushyingo 2023 mu Rwanda habereye imikino y'Akarere ka 5 y'amakipe mu cyiciro cy'abagore "Africa Women Basketball League Zone 5 Qualifiers 2023" yari igamije gushaka itike y'imikino y'Afurika " FIBA Africa Women Basketball League 2023" izabera mu Misiri.

Iyi mikino yabereye muri LDK yari yitabiriwe n'amakipe 9 aho yari agabanyije mu matsinda abiri. Itsinda A ryari rigizwe na APR BBC (Rwanda), Equity Bank (Kenya), Vijana Queens (Tanzania) na Gladiators (Burundi) naho itsinda B rigizwe na REG BBC (Rwanda), KPA (Kenya), JKT Stars (Tanzania), Nile Legends (South Sudan) na JKL Dolphins (Uganda).

Ikipe ya KPA yo muri Kenya ni yo yegukanye igikombe itsinze ku mukino wa nyuma ikipe ya REG BBC yo mu Rwanda ku manota 87 kuri 53. Ikipe ya Equity Bank (Kenya) yegukanye umwanya wa 3 itsinze na JKL Dolphins yo muri Uganda ku manota 78 kuri 74.

Ikipe ya APR BBC ifite igikombe cya shampiyona nayo yari ihagarariye u Rwanda yasoreje ku mwanya wa 5 aho yatsinze Gladiators (Burundi) ku manota 61 kuri 57.

### Uko amakipe yakurikiranye

Ikipe ya KPA (1), REG BBC (2), Equity Bank (3), JKL Dolphins (4), APR BBC (5), Gladiators (6), Nile Legends (7), Vijana Queens (8) na JKT Stars (9).

Aya makipe abiri ya mbere, KPA na REG BBC ni yo azahagararira Akarere ka 5 mu mikino ya nyuma y'Afurika izabera mu Misiri kuva taliki 08 kugeza 17 Ukubona 2023.



## Golf : Ashley Awuor yegukanye irushanwa mpuzamahanga ryabereye mu Rwanda

Taliki 03 Ugushyingo 2023 ni bwo hasojwe irushanwa mpuzamahanga ry'umukino wa Golf mu cyiciro cy'abagore "East and Central All Africa Challenge Trophy 2023" ryabereye ku kibuga cya Kigali Golf Resort & Villas i Nyarutarama kuva taliki 01 Ugushyingo 2023.

Iri rushanwa ryari ribereye bwa mbere mu Rwanda ryari ryitabiriwe n'abakinni baturutse mubihugu 7 ari byo u Rwanda, Burundi, Kenya, Tanzania, Mauritius, Zambia na Uganda.

Umukinni ukomoka muri Kenya, Ashley Awuor ni we wegukanye iri rushanwa akurikirwa na Madina Iddy (2) na Neema Olomi (3) bombi bakomoka muri Tanzania. Bianca Ngecu (Kenya) yahawe igihembo cy'umukinni witwaye neza ukiru muto.

Muri rusange, ikipe ya Tanzania ni yo yitwaye neza yegukana iri rushanwa akaba ari n'inshuro ya 2 yikurikiranya.



## Mountain Bike: Daniel Gathof na Bart Classens begukanye Rwandan Epic 2023

Taliki 04 Ugushyingo 2023 ni bwo hasojwe isiganwa ry'amagare yo mu misozi "Rwanda Epic 2023".

Muri iri siganwa abakinni bitabiriye bakinnye mu byiciro bibiri harimo icy'abakina ari 2 ndetse n'abakina ku giti cyabo aho bahatanye mu ntera 5 zireshya na kilometero 273,5.

Mu bakina ari babiri, ikipe ya Daniel Gathof ukomoka mu Budage na Bart Classens ukomoka mu Buholand yegukanye irushanwa aho muri rusange yakoresheje amasaha 12, iminota 38 n'amasegonda 33. Ku mwanya wa kabiri haje ikipe ya Bobby Joseph na Ndung'u Wa Keiya (Kenya) yakoresheje amasaha 13, iminota 35 n'amasegonda 42 naho ku mwanya wa 3 haza ikipe ya Ota Zima na Miroslav Rybacek (Czech Republic) yakoresheje amasaha 14, iminota 47 n'amasegonda 24.

Ikipe ya Munyaneza Didier (Rwanda) na Florian Magdalenc (Germany) yasoreje ku mwanya wa 6 ikoresheje amasaha 16, iminota 12 n'amasegonda 36 naho ikipe yari igizwe n'Abanyarwanda gusa, Manizabayo Jean De Dieu na Iradukunda Valens isoreza ku mwanya wa 7 aho yakoresheje amasaha 16, iminota 17 n'amasegonda 17.

Mu bakina ku giti cyabo, Olivier Kestelyn ukomoka mu Bubiligi wakoresheje amasaha 13, iminota 59 n'amasegonda 5, ku mwanya wa kabiri haje Bukhari Banzi (Rwanda) wakoresheje amasaha 15, iminota 29 n'amasegonda 42 naho ku mwanya wa 3 haza Bart Meganck (Belgique) wakoresheje amasaha 16, iminota 17 n'amasegonda 36.

Mu bagore, umukinni w'Umunyarwanda wakinnye uduce twose ari wenyine yasoje akoresheje amasaha 21, iminota 8 n'amasegonda 38.



## Tennis: Habaye amatora ya Komite nyobozinshya ya RTF

Taliki 05 Uguhsyingo 2023 habaye amatora ya Komite nyobozinshya y'ishyirahamwe ry'umukino wa Tennis mu Rwanda "RTF".

Karenzi Théoneste wari usanzwe ari Perezida ni we Wongeye kugirirwa icyizere muri manda y'imyaka 4 iri imbere (2023-2027). Ku mwanya wa Visi Perezida wa mbere hatowe Ndahayo Claver, Visi Perezida wa kabiri hatorwa Dr Mbabazi Jennifer, ku mwanya w'Umunyamabanga hatorwa Rutagemwa Donath naho Umubitsi aba Hakorimana Juvens.

Komite nshya ya RTF yiyemeje kuzamura ubushobozi bw'abatoza, abasifuzi, gukorana n'abaterankunga, kubaka ibikorwaremezo bya siporo harimo n'ibibuga bihagije kandi bigezweho.

Komite yari icyuye igihe mu myaka 4 yashoboye kwakira no gutegura amarushanwa mpuzamahanga atandukanye arimo "ITF World Tennis Tour Junior J30", "Davis Cup Africa", "ITF/CAT East Africa Junior Championship", "Rwanda Open", "ITF World Tennis Tour" na "Billie Jean King Cup Africa".



## Taekwondo: Dr. Hakizimana yitwaye neza mu mahugurwa yabereye muri Koreya

Taliki 04 Ugushyingo 2023 ni bwo Perezida w'ishyirahamwe ry'umukino wa Taekwondo mu Rwanda "RTF", Dr. Hakizimana David yagarutse mu Rwanda avuye muri Koreya aho yari yitabiriye amahugurwa y'ukwezi yari agamije kuzamura ubumenyi muri uyu mukino "Global Taekwondo Master Training Program 2023".

Aya mahugurwa yabereye ku cyicaro cy'ishyihamwe ry'umukino wa Taekwondo ku lsi kiri muri "Kukkiwon" kuva taliki 06 kugeza 31 Ukwakira 2023 yari yahuje abarimu "Masters" ba Taekwondo baturutse mubihugu bitandukanye byo ku migabane yose ylsi. Abayitabiriye bahuguwe ku buryo bugezweho bukoreshwa mu kwigisha Taekwondo haba mu kurwana "Kyorugi" ndetse no kwiyereka "Poomsae" n'ibindi.

Mu gusoza, Dr. Hakizimana ni we witwaye neza ahabwa impamyabushobozi wenyinge n'Umuyobozu Mukuru wa Taekwondo ku lsi "World Taekwondo", Chungwon Choue nk'uhabaye indashyikirwa mu bandi banyeshuri bose.





Website: [www.olympicrwanda.org](http://www.olympicrwanda.org)

[www.olympicrwanda.org/commonwealth](http://www.olympicrwanda.org/commonwealth)

Email: [cnosr@olympicrwanda.org](mailto:cnosr@olympicrwanda.org) | @RwandaOlympic

Address: Remera-Hallmark Center Building KG 17 Ave